



KEMENTERIAN PERPADUAN NEGARA

TEKS UCAPAN ALUAN

**YB DATUK AARON AGO DAGANG
MENTERI PERPADUAN NEGARA**

SEMPENA

**MAJLIS PERASMIAN
SAMBUTAN MINGGU PERPADUAN 2025**

19 JULAI 2025 (SABTU)

10.30 PAGI

**PEKARANGAN STADIUM NEGERI PULAU PINANG,
BATU KAWAN, PULAU PINANG**

Salam Malaysia MADANI dan Salam Perpaduan.

SALUTASI

Salutati terkini disediakan secara berasingan.

PENDAHULUAN

1. Sesungguhnya kita semua berasa amat bertuah atas **kehadiran YAB Dato' Seri Anwar Ibrahim, Perdana Menteri** untuk merasmikan **Sambutan Minggu Perpaduan Peringkat Kebangsaan Tahun 2025**.
2. **Tema sambutan kita pada tahun ini, "Harmoni Dalam Kepelbagaian", cukup signifikan dan tepat pada masanya.** Ia mencerminkan aspirasi bersama kita untuk terus menyemai semangat perpaduan serta memperkukuh ikatan persaudaraan dalam kalangan rakyat Malaysia.
3. **Sambutan Minggu Perpaduan merupakan program utama (signature programme)** Kementerian Perpaduan Negara yang menjadi **platform interaksi dan tapak integrasi** untuk menyemarakkan semangat perpaduan serta memperluas pengetahuan terhadap kepelbagaian adat, budaya dan tradisi masyarakat Malaysia.

4. Sambutan pada tahun ini adalah yang ketiga selepas **penganjuran kali pertama di Kuching, Sarawak pada tahun 2023 manakala sambutan kali kedua pada tahun 2024 di Johor Bahru.**
5. Sepanjang Sambutan Minggu Perpaduan Peringkat Kebangsaan ini, terdapat lebih 40 aktiviti utama diadakan, antaranya **25 Pameran Rumah KAMI, Pameran Perkampungan Rumah Etnik Kadazan Dusun & Orang Asli, Foodunites, Pameran Susur Masa oleh Jabatan Muzium Malaysia, Pameran Malaysia Tanah Airku, sukan rakyat, Jualan Usahawan Perpaduan & Jualan MADANI, pesta buku serta persembahan artis dan kebudayaan.**
6. Di samping itu, Kementerian turut mengambil langkah untuk menganjurkan siri Jelajah Sambutan Minggu Perpaduan di setiap negeri. Sebanyak **7 negeri iaitu Melaka, Kedah, Kelantan, Sabah, Johor, Perlis dan Terengganu telah selesai mengadakan Sambutan Minggu Perpaduan.** Selepas peringkat kebangsaan ini akan diteruskan kepada negeri-negeri yang lain.
7. Untuk makluman YAB, Kementerian Perpaduan Negara sedang merangka **pendekatan baharu bagi memperkukuh pelaksanaan Sambutan Minggu Perpaduan pada tahun depan.**

8. **Salah satu pendekatan inovatif yang akan diperkenalkan adalah konsep "2 dalam 1" di peringkat negeri**, iaitu penggabungan antara Sambutan Minggu Perpaduan dengan sambutan perayaan budaya etnik minoriti di negeri masing-masing.
9. Pendekatan ini **mengiktiraf warisan etnik minoriti** dan membuka ruang kepada rakyat untuk menghargai kepelbagaian budaya yang membentuk identiti Malaysia. Sebagai contoh:

NEGERI	ETNIK	PERAYAAN
Perak	Siam	Pesta Songkran
Sarawak	Melanau	Pesta Kaul
Sabah	Rungus	Pesta Magahau
Kelantan	Temiar	Sambutan Orang Asal
Johor	Bugis	Pesta Lepa-Lepa

PERPADUAN DI MALAYSIA

Hadirin yang saya muliakan sekalian,

10. Kementerian Perpaduan Negara sentiasa komited dalam mengukuhkan semangat perpaduan, kenegaraan, kebersamaan, muhibbah dan kesukarelawan dalam kalangan rakyat Malaysia. Usaha ini dilaksanakan selaras dengan **Perlembagaan Persekutuan, Rukun Negara dan berpandukan Dasar Perpaduan Negara.**

11. Pada tahun 2023, Kementerian Perpaduan Negara telah memperkenalkan satu kerangka penting yang dikenali sebagai ***Kerangka Perpaduan Membangun Malaysia MADANI***. Kerangka ini menjadi asas kepada pendekatan strategik kementerian dalam memupuk perpaduan berlandaskan nilai-nilai MADANI.
12. Selaras dengan itu, kementerian mengguna pakai pendekatan **Perpaduan Dalam Kepelbagaian** sebagai fokus utama, dengan memberikan penekanan kepada **penghayatan semula Rukun Negara** termasuk pelaksanaan lafaz penuh ikrar Rukun Negara di sekolah, institusi pengajian tinggi, majlis rasmi kerajaan, Parlimen dan kini turut diperluaskan ke beberapa Dewan Undangan Negeri (DUN).
13. Pada tahun ini, tema '**Harmoni Dalam Kepelbagaian**' diperkenalkan untuk meningkatkan keharmonian antara penganut agama di negara ini. Tema ini mencerminkan realiti masyarakat Malaysia yang majmuk, di mana perpaduan hanya dapat dicapai melalui penerapan nilai **Faham, Hormat dan Terima** antara satu sama lain dalam menuju laluan keharmonian bersama.
14. **Indeks Perpaduan Nasional (IPNas)** kini sedang dilaksanakan untuk kali ketiga dan dijangka skor sebanyak **0.7**, yang mencerminkan tahap perpaduan

dalam kalangan rakyat Malaysia. Indeks ini menilai aspek-aspek penting seperti **hubungan antara etnik, persepsi terhadap identiti nasional dan kepercayaan sosial**, sekali gus menjadi rujukan utama dalam merangka dasar serta inisiatif kementerian ke arah memperkukuh perpaduan negara.

15. Sejak tahun 2023, pelbagai inisiatif telah dilaksanakan dan jelas memperlihatkan bahawa **pembinaan Negara Bangsa** merupakan **matlamat akhir** kepada usaha **memperkukuh perpaduan nasional**.
16. **Pembinaan negara bangsa** kini turut diangkat sebagai salah satu teras utama dalam **RMK13**. Sehubungan itu, Kementerian Perpaduan Negara sedang melaksanakan sesi libat urus di seluruh negara bagi merangka **Pelan Tindakan Pembinaan Negara Bangsa**, disusuli penganjuran **Persidangan Pembinaan Negara Bangsa** pada Oktober ini.
17. Saya berharap agar **YAB Perdana Menteri** dapat merasmikan persidangan ini sebagai simbol komitmen kerajaan terhadap agenda perpaduan nasional.

PENGUKUHAN JATI DIRI

Hadirin yang saya hormati sekalian,

18. **Pegawai-pegawai perpaduan, kurator muzium, pustakawan dan pegawai arkib** mungkin tidak selalu berada di hadapan lensa media atau pentas utama, namun hakikatnya mereka telah lama **menjadi tiang belakang dalam usaha membina jati diri nasional dalam kalangan pelbagai generasi di negara ini.**
19. Merekalah yang telah menjadi penggerak utama kepada pelbagai program penting kementerian, khususnya dalam **usaha memperkukuh jati diri dan semangat kenegaraan dalam kalangan generasi muda.** Antara program yang telah berjaya dilaksanakan termasuklah:
 - I. **Arkib@Sekolah** – Membawa bahan sejarah asli dan dokumen penting negara terus ke sekolah
 - II. **Gerak Integrasi Perpaduan (GRIP)** – Mewujudkan ruang interaksi silang budaya antara pelajar sekolah dari pelbagai kaum dan latar belakang
 - III. **Inspirasi Pelajar Inovasi Muzium** – Program pendidikan sejarah secara interaktif di muzium melalui aktiviti berasaskan pengalaman (*hands-on learning*)

20. Saya juga memohon jasa baik agar **YAB Perdana Menteri yang juga Menteri Kewangan** dapat mempertimbangkan peruntukan khusus, saya tak minta banyak lebih kurang **RM10 juta**, bagi melaksanakan program-program kenegaraan untuk **generasi muda** dalam **Bajet 2026** nanti.
21. Akhir sekali, saya merakamkan setinggi-tinggi penghargaan kepada YAB Perdana Menteri atas kelulusan penubuhan **Majlis Sejarawan Negara** yang bakal dipengerusikan sendiri oleh beliau. Majlis ini amat penting bagi menyemak semula fakta sejarah yang kurang tepat, tersalah tafsir atau tertinggal, demi memastikan naratif sejarah negara kekal tulen dan seimbang.

PENUTUP

Hadirin yang saya muliakan sekalian,

22. Sebagai penutup, saya ucapkan terima kasih kepada semua pihak, khususnya Kerajaan Negeri Pulau Pinang selaku tuan rumah SMP Kebangsaan tahun ini. Saya yakin program ini akan terus menyemarakkan semangat perpaduan ke arah pembentukan masyarakat MADANI yang bersatu dan harmoni.

Sekian, terima kasih.